


ISLAM I MUSLIMANI U ČEŠKOJ

S obzirom da u Češkoj Republici nema popisa pučanstva prema vjeroispovijedi, to se i nagađa o broju muslimana. Ministarstvo unutrašnjih poslova procjenjuje da u Češkoj živi oko 10.000 muslimana, što se može i smatrati realnom brojkom. Neki međutim tvrde da ih ima između 30.000-50.000 što je dosta upitno.

U Čehoslovačkoj je osnovana prva Islamska zajednica davne 1934 godine, a zakonom je priznata 1935 godine. Priznanje je ponovljeno 1941 godine kada je već buknuo Drugi svjetski rat. Naime te godine vlasti Čehoslovačke su dopustile muslimanima da vode knjige vjenčanja i umrlih. Te godine izašao je i prvi broj lista pod imenom *Hulas*. Kada je 1989 pao komunizam i muslimani su poput pripadnika ostalih crkava i vjerskih zajednica snažno intenzivirali svoj rad i aktivnosti. Te godine muslimanski studenti iz islamskih zemalja osnivaju svoju udrugu koja će biti okosnica daljnjeg muslimanskog okupljanja.

Muslimani drugog grada po veličini Brna su 1998. godine otvorili prvi mesdžid u ovoj zemlji. Izgradnja ovog vjerskog objekta nije bila bezbolna. Brojne češke nevladine udruge protivile su se gradnji mesdžida u Brnu. Ono što ohrabruje jeste podrška Kršćanske demokratske stranke nastojanjima muslimana da izgrade mesdžid.



Unutrašnjost mesdžida u Brnu svečano otvorenog 1998. godine

Godinu dana nakon otvaranja prvoga mesdžida u Češkoj, otvoren je i drugi u glavnom gradu Pragu. Danas stotine muslimana imaju mjesto na kome mogu obavljati svoje zajedničke islamske obveze.



Vanjski izgled džamije u Brnu

Imam mesdžida i Islamskog centra u Pragu je Bošnjak po imenu Emir Osmić, rođen 1977 godine u Bosni. Nakon medrese u Sarajevu studirao je u Jordanu na Fakultetu za da'vu i Usulid-din. Prije toga bio je imam u Bosni. Prema njegovim riječima u Češkoj ima oko deset tisuća muslimana. On tvrdi da vlasti Češke ne prave muslimanima i islamskoj zajednici nikakve probleme. Naprotiv od nekih političkih stranaka dobivali su podršku u svojim nastojanjima da osiguraju sve uvjete za rad i razvoj Islamske zajednice. Imam Osmić najveći problem muslimana Češke vidi u malom broju muslimana i slabom ekonomskom stanju. Velika većina njih su obični radnici i zanatlije, dok se na prste jedne ruke mogu izbrojati intelektualci.



Mesdžid i Islamski centar u Pragu otvoren 1999. godine.

Što se tiče temeljnih podataka o češkoj treba reći da je od 1918. godine tvorila sa Slovačkom Federaciju koja se zvala Čehoslovačka, sve do 1993 godine kada su se dvije države mirno razišle i osamostalile. Češka je jedina zemlja u Europi koja ima 59% ateista, 26,8% rimskih katolika, 1,2% protestanata 1% Husita, 0,2% pravoslavaca, 0,2% Jehovinih svjedoka i 2,8% pripadnika ostalih relija a među njima su i muslimani. Češka je podijeljena na 14 županija, sa glavnim gradom Pragom u kome živi 1,179.000 stanovnika.